

Nguvu Inayotakasa, Inayotoa Uhai

Ee Mungu, uniumbie moyo safi, Uifanye upya roho iliyotulia ndani yangu.
Zaburi 51:10.

Bwana hutakasa moyo kama vile tunavyotia hewa ndani ya chumba. Hatufungi milango na madirisha na kutupa ndani dawa fulani ya kusafisha; bali tunafungua milango na kufungua madirisha na kuruhusu angahewa safi ya mbinguni kujaa ndani. ... Madirisha ya mihemko ya ghafla, ya hisia ni lazima yafunguliwe kuelekea mbinguni na vumbi la ubinafsi na kuupenda ulimwengu lazima liondolewe. Neema ya Mungu ni lazima ijae katika vyumba vya akili, fikira ni lazima ziwe na mada za kutafakari za mbinguni na kila sehemu ya mwili ni lazima itakaswe na kupewa uhai na Roho wa Mungu.

Yeye anayeishi kulingana na kanuni za dini ya Biblia, hataonekana kuwa dhaifu katika nguvu za kimaadili. Chini ya uwezo wa Roho Mtakatifu unaoadilisha, ladha na mielekeo huwa safi na takatifu. Hakuna kitu chochote kinachokamata shauku kwa nguvu sana kiasi kile, hakuna kitu kinachofika kikamilifu kiasi kile kwenye kina cha ndani kabisa cha nia za tendo, hakuna kitu kinachotoa mvuto wenye nguvu kiasi kile kwenye maisha na kutoa uthabiti na nguvu kubwa kwa tabia, kama dini ya Kristo. Hiyo humwongoza mwenye nayo daima kuelekea juu, ikimtia moyoni makusudi bora, ikimfundisha adabu ya mwenendo na kutoa heshima inayofaa kwa kila tendo.

Kanisa ndiyo lengo la upendo na utunzaji mkuu wa Mungu. Ikiwa washiriki watamruhusu, Atadhihirisha tabia Yake kupitia kwao. Anawaambia, "Ninyi ni nuru ya ulimwengu" (Mathayo 5:14). Wale wanaotembea na kuzungumza na Mungu huishi kwa kutenda upole wa Kristo. Katika maisha yao, uvumilivu, upole na kujizuia huunganishwa na ari na bidii takatifu. Wanaposonga mbele kuelekea mbinguni,

Pembe zile kali zinazoparuzwa za tabia humalizwa taratibu na utauwa huonekana. Roho Mtakatifu, akiwa amejaa neema na uweza, hufanya kazi juu ya akili na moyo.

Moyo ule ambamo ndani yake Yesu anafanya makao Yake utahuishwa, utatakaswa, utaongozwa na kutawaliwa na Roho Mtakatifu na wakala mwanadamu atafanya juhudi kubwa kuleta tabia yake katika upatanifu na Mungu. Ataepuka kila kitu ambacho kinapingana na mapenzi na akili ya Mungu iliyodhihirishwa.